
БИТИРУВЧИЛАР УЧУН МЕҲНАТ ЯРМАРКАСИ

Вилоят ҳокимининг шу йил 4 апрелдаги “Касб-ҳунар коллежлари битирувчиларини ишга жойлаштириш ва ўз бизнесларини очишга кўмаклашиш бўйича махсус ярмаркаларни тизимли ташкил этиш чора-тадбирлари тўғрисида”ги қарорига асосан вилоятимиздаги 34 та таянч касб-ҳунар коллежларида махсус меҳнат ярмаркалари ўтказиш режалаштирилган.

Режага мувофиқ 5-11 апрель кунлари 16 та таълим муассасаларида махсус меҳнат ярмаркалари ташкил этилди.

Вилоятдаги 144 та касб-ҳунар коллежларини 53620 нафар ўқувчилар 124 та мутахассислик бўйича тамомламоқдалар. Бугунги кунда 53165 нафар битирувчилар 4 томонлама шартномалар имзолашди. Битирувчилар билан ўтказилган сўровномалар натижасида 17245 нафари олий ўқув юртларига кириш, 5433 нафари тижорат банкларидан имтиёзли кредит маблағларини олиш истагини билдиришган.

Махсус меҳнат ярмаркаларидан бири Фарғона туманидаги технология касб-ҳунар коллежида ўтказилди. Меҳнат ярмаркасида тумандаги 6 та касб-ҳунар коллежлари ўқувчилари қатнашди. Унда 37 та корхона-ташкилот, муассасалар ўзларидаги 257 та бўш иш ўрни билан иштирок этди.

– Фарғона тумани технология касб-ҳунар коллежининг “Қишлоқ хўжалиги маҳсулотларини қайта ишлаш” йўналишида ўқийман, – дейди Аюбхон Абдулазизов.- Бугун “Халқ банки” томонидан имтиёзли кредит олиш учун сертификат олдим. Ўқишни тамомлагач, қишлоқ хўжалиги маҳсулотларини қайта ишлашга мўлжалланган миницеҳ очиб, ўз бизнесимни йўлга қўймоқчиман.

Ярмаркада битирувчиларнинг ота-оналари ҳам қатнашди. Уларни қизиқтирган саволларга мутахассислар жавоблар қайтаришди.

2017-04-17 14:07:47